

2 Peed

Ta jawén Jesus hã h'yy ka'eeh do hã Peed ma erih do hahÿÿh

¹ Simaw Peed, Jesus Kristo karom, ta mejũũ do see ÿ ti hÿÿh. Ý edëng bëeh, ãã nemuun Jesus Kristo hyb n'aa P'op Hagä Do hã h'yy ka'eeh doo. Baad had'op ti Jesus Kristo P'op Hagä Do ër h'yy kaha'eeh doo, ër h'yyb tym dëeb. Baad had'op tabahadoo do hyb n'aa ër hã tabanoo P'op Hagä Do hã ër h'yy ka'eeh hyb n'aa. Tak'ëp baad ub ta ti ër h'yy ka'eeh do ër hã tanoo doo. ² P'op Hagä Doo, Jesus ër Wahë N'aa na-ããj hë bë bahapäh do hyb n'aa bë h'yyb gó, ÿ karën tak'ëp P'op Hagä Do ky enyym bë wë, ÿ karën baad had'yÿt hë bë tah'yÿb en'yym.

Tak'ëp ji hyb n'aa tam'aah baad had'yÿt hë ji bawät hyb n'aa ky n'aa hahÿÿh

³ Ta hejój me P'op Hagä Do an'oo däk ër hã sahõnh hë baad hadoo doo, ji bahajaa hyb n'aa papuuj gó, takarën doo da ji bawät hyb n'aa. Ta ti tawén n'oo däk ër hã, Kristo, ër tanaëej wät do ër hapëë däg kån do hyb n'aa ër h'yyb gó. Ta kabaj'aa doo me, tak'ëp taky enyym doo me ër tanaëej wät ta karapee ër bahadoo hyb n'aa. ⁴ Ta kabaj'aa do hyb n'aa, tak'ëp taky enyym do hyb n'aa na-ããj hë, tak'ëp baad hadoo doo, tak'ëp ji kamahän do taky däng paa ër hã. Ta ti ër hã taky däng do an'oo bã, baad P'op Hagä Do bawät doo da ër babok hyb n'aa. Ër hã taky däng do tan'oo bã na-ããj hë ër

bedep hyb n'aa, Jesus hã h'yy kana'eeh do sa h'yyb karejãã do mahãnh. Nesaa do ji h'yyb sãg karẽn do jawén rababok do hyb n'aa sa h'yyb karejãã tii.

⁵ Ta ti hyb n'aa né hẽ, taw'ããts hẽ tak'ep bë hyb n'aa tam'aah takah'ũũm hyb n'aa bë h'yy ka'eeh doo. Taw'ããts hẽ baad had'yyt hẽ bë babok. Taw'ããts hẽ bë hyb n'aa tam'aah bë h'yy ganãng hyb n'aa P'op Hagã Do karẽn do hã. ⁶ Taw'ããts hẽ bë h'yyb bë mesoo, bë h'yyb karẽn do jawén bë nabok hyb n'aa. Taw'ããts hẽ h'yy ganajeng doo me bë baboo had'yyt hẽ. Taw'ããts hẽ P'op Hagã Do karẽn doo da bë babok. ⁷ Taw'ããts hẽ bë kamahãn bë wakããn hedoo doo, bë nemuun Jesus hã h'yy ka'eeh doo. Taw'ããts hẽ bë kamahãn sahõnh hẽ ta wób. ⁸ Sahõnh hẽ ta ti takah'ũũm bã had'yyt hẽ bë h'yyb gó, dooh daap hẽ tado da tii bã Jesus Kristo, er Wahẽ N'aa bë hapãh doo. Baad hadoo ta hanaa tii. ⁹ Tii d' nado y ẽ etsén wãt doo da nabok do hã. Baad rabanahapãh do hadoo tii. Ty temah do hadoo.* Ramabaan nesaa do sa hã hanãng do paa kawug hõm doo. ¹⁰ Ti hyb n'aa, wakãn haa hedoo doo, taw'ããts hẽ ta bahãnh bë hyb n'aa tam'aah, P'op Hagã Do naëej wãt do wób né bëeh, bë metëeh hyb n'aa, P'op Hagã Do asëew hõm do wób né bëeh, bë metëeh hyb n'aa. Sahõnh hẽ ta ti bë hã y ẽ ets'ëẽ wãt do bë moo boo bã, dooh né da bë h'yy keréd hõm bã P'op Hagã Do hã. ¹¹ Tii bã, baad bë P'op Hagã Do gadoo da Jesus Kristo, er Wahẽ N'aa, er h'yyb tym dëeb tabagãã had'yyt doo bã.

Te hub né hẽ Jesus mejũũ do rama metëek do ky n'aa hahỹh

* **1:9** Dooh rah'yy gah'ood bã P'op Hagã Do karẽn do hã, tahanãng pé tii.

¹² Bë hapëë däg né paawä bë ÿ ma erii wät do ky n'aa, baad bë gado däg né paawä bë h'yyb gó baad hadoo do ky n'aa bë rama met'ëeg wät doo, ÿ karën bë hyb n'aa es'ee had'yyt hē ta tii. Dooh ÿ h'yy gajëë hōm bä bë ÿ maher'oot doo, bë manabaan hyb n'aa. ¹³ Hã ÿÿ, taw'ãäts hē tii da bë ÿ maher'ood had'yyt hē badäk hahÿÿ bä ÿ bawät nä bä, ¹⁴ edaa däk ÿ bahapäh do hyb n'aa badäk hahÿÿ bä ÿ bawät do gawatsik. Ër Wahë N'aa, Jesus Kristo metä wät ta ti hã ÿÿ. ¹⁵ Edaa däk ÿ dajëp doo. Ti hyb n'aa ÿ karën sahōnh hē ÿ moo wät ÿ hajaa doo, badäk hahÿÿ bä ÿ bawät nä bä, ÿ dajëp jawén paa bä na-ãäj hē bë hyb n'aa es'ee had'yyt hē hyb n'aa ta ti bë ÿ maher'ood wät doo.

¹⁶ Ër Wahë N'aa Jesus Kristo hejój ky n'aa bë ãã maher'oot noo gó, p'aa hēnh da tamatëeh bë ãã maher'oot bä, dooh sa panyyg ub h'yy ganyy gó sa daaj hē rahyb n'aa newëë do ãã ky s'ũüd bä. ãã daaj hē né hē ãã matym me ãã bahapäh tak'ëp ta kabaj'aa doo, ¹⁷⁻¹⁸ waëë P'op Hagä Do wë kasëew hōm do jó. Ta tii bä P'op Hagä Doo, ta Yb, weh'ëeh ta hã, ta bag tak'ëp gabarëeh doo gó tabawät tabanoo na-ãäj hē. Hahÿÿ da P'op Hagä Do kyyh ta hã: “Hahÿ tah ÿÿ, tak'ëp ÿ kamahän up doo. Baad ÿ h'yy gadajang ta wë”,† näng mäh. ãã daaj hē ãã maa napäh ta kyyh, Jesus sii ta tii bä ãã bab'ëeh bä.

¹⁹ Ta ti ãã bahapäh, ta ti ãã maa napäh do hyb n'aa na-ãäj hē, ta bahänh baad ãã bahapäh te hub né hē Kristo matëeh do ky n'aa hã P'op Hagä Do ky n'aa rod rerih do paah. Ti hyb n'aa ÿ karën paawä

† **1:17-18** Matew 17.5, Maah-Ko 9.7, Rukas 9.35

baad bë hyb n'aa matakä Kristo ky n'aa rerih do paa hã. Ta bag atsëm ta tyw n'aa ji hã tametëeh do hadoo rerih do paah. P'op Hagä Do ky n'aa rod rerih do hã bë hyb n'aa matakä bã bë da hapäh ny hadoo do ji ky daheeh, ny hadoo do noo kanesa doo. Taw'ãäts hë rerih do bë ky dahé had'yyt hë Kristo matëeh bã kä. Tii bã kä, baad Kristo bë da tah'yy gan'yyh P'op Hagä Do hã. Watom tapajëë bã hana do hadoo bë hã Kristo. ²⁰ Hahÿ ti baad ÿ karën bë hyb n'aa newëë: Dooh sa hanaa tado bã P'op Hagä Do kyy kerih doo gó ta ky n'aa rod rerii bong do paah. ²¹ Dooh sa hanaa tado bã ta jawén hawät do ky n'aa raheer'oot do paah. P'op Hagä Do Sahee h'yyb mahũüm paa tii, P'op Hagä Do kyyh ramaher'oot hyb n'aa.

2

Ma matëg oow ky n'aa hahÿÿh

¹ Isaraéw buuj mahang P'op Hagä Do ky n'aa rod oow, noo kanesa doo, rababong do paa hadoo, bë mahang na-ããj hë ti anäng da ma matëg oow. Ky kamep'ëeh doo me rama metëek da te hub nadoo doo. Kristo, sa kariw n'aa, sa danäh, tadajëp doo me tedëeb wät do sa hã, ramakyyys da. Jé sa kyyh maa newëë do reréd hõm da Jesus hã rah'yy ka'eeh do paah. Ti hedoo do ma matëg oow nayyw hë sa daaj hë sa ky n'aa katakyyk baad nadoo do hã. Gawatsig hõm da. ² Hajõk da ky s'ũüt ma matëg oow. Nu meby n'aa näng do ma matëg oow ramoo bok do ramoo bok da na-ããj hë. Sa hyb n'aa Jesus hã h'yy kana'eeh do baad nadoo doo me raheer'oot da ta tyw n'aa heh'äät doo. ³ Tak'ëp ta sãm hã

rah'yy kajäk do hyb n'aa, sa panyyg sa daaj hē rahyb n'aa newēē doo me ma matēg oow bē da rawedii, bē wē hanäng do bē anoo hyb n'aa sa hã. P'ooj däg P'op Hagä Do h'yyb dēē däk nesaa do hã taky n'aa etyy ta tii. P'op Hagä Do rejãã né da tii. Dooh da rakedēēb bä. ⁴ Dooh P'op Hagä Do t'yyd mehĩn bã äãs wób p'ooj ub nesaa do moo bok doo. Tabanesaa hēnh tadewäts bēeh tii, t'öp gadagyp doo gó. Ta tii bã ragada P'op Hagä Do ky n'aa etyy noo gó sa hã. ⁵ Dooh na-ãäj hē P'op Hagä Do t'yyd mehĩn bã ta hã waneh'ēēh do p'ooj ub habok doo, hag'yyp do tamejũũ noo gó sa wē. Jããm hē Nowéh tabed'ēēp naeng hag'yyp do mahänh, setsi ta sii habok do sii hē. Nowéh tii, ta wób tamaher'ood had'yyt hē P'op Hagä Do karēn doo da rababok hyb n'aa paawä. ⁶ P'op Hagä Do ky n'aa etyy paa panang Sodoma, Gomoha häd enäh do ta babuj n'aa sii hē tēeg hõõ me, sahõnh hē tagawatsig hõm hyb n'aa. Jããm hē ta ooj mad'aak paah, tak'ēp hadoo do tamo haj'aa haj'aa. Sa hã tabad'oo do hã tametēēh nyy da tamoo wät da P'op Hagä Do waneh'ēēh do sa hã. ⁷ Jããm hē panang buuj mahang tabed'ēēp Róh, baad ub, P'op Hagä Do karēn doo da hawät doo. Tak'ēp Róh h'yy katón paa tak'ēp baad nadoo do nanäng P'op Hagä Do ky n'aa jaw'yyk do ky nadah'eeh do ramoo bong do hyb n'aa sa hã hanäng doo me. ⁸ Sa mahang Róh bawät paah. Ta äh hã had'yyt hē Róh, P'op Hagä Do karēn doo da hawät do ahoop paa ta h'yyb gó, tahapäh do hyb n'aa, tamaa napäh do hyb n'aa na-ãäj hē nesaa do panang buuj ramoo bok doo. ⁹ Hỹỹ kä, ta tii da P'op Hagä Do t'yyd manehĩn do hyb n'aa paa nesaa do moo heb'oo

doo, tii da tabed'ëep do hyb n'aa paa baad habok doo, ji hapäh hahÿÿh: P'op Hagä Do hajaa né hē takarēn doo da habok do tabed'ëep hejooñh do sa hā kametyy do mahānh. P'op Hagä Do hajaa na-āāj hē tarejā had'yyt hē nesaa do moo heb'ooñ doo, sahōñh hē taky n'aa etyy noo gó kajaa bā kā.*
 10 Tarejāā do mahang tak'ëp sa bahānh tarejāā da nesaa do sa h'yyb säg karēn do jawén habok do hyb n'aa nu meby n'aa nāng do sa hā hanāng doo me moo bok doo, baad nahado bong do hajaa do P'op Hagä Do matym gó. Sa bahānh P'op Hagä Do rejāā da tamejūū do mak'yys doo.

Sa hā hē ma matëg oow rah'yy kasab'ee. Rah'yy karēn doo da ramoo bok. Dooñ raky daheeh péh. Dooñ rajeÿÿm pé ta tii. Ti hyb n'aa, dooñ rajeÿÿm bā kabaj'aa do nes'aa padëek do raky n'aa rejā bā. 11 Aās kā, ma matëg oow sa bahānh hejooj né paawā, sa bahānh rahyb n'aa jewyg né paawā, dooñ raky n'aa rejāā doo me Tak'ëp Hyb N'aa Jawyk Do matym gó raky n'aa tapa bā kabaj'aa do nes'aa padëek doo. 12 Har'ëeng hadoo ti ma matëg oow. Dooñ har'ëeng rah'yy genā bā. Ti abong har'ëeng ji masoo hyb n'aa, ji nabooh hyb n'aa. Har'ëeng h'yy ganenāñ do hadoo ma matëg oow ÿ wén nāng, tak'ëp baad nadoo doo me raba-her'oot ranahapäh do hā. Ti hyb n'aa P'op Hagä Do gawats'iik da tii, har'ëeng ji nabooh do hadoo. 13 P'op Hagä Do rejāā da ta tii, ta wób rarahejāā do mabaj. Baad ub sa hā pé adëb bā sii hē rah'yy

* **2:9** Jesus matëeh noo gó P'op Hagä Do ky n'aa etyy da sahōñh hē badäk hahÿÿ hā habok do paah, āās sii hē. Nesaa do moo heb'ooñ do taky n'aa etyy da banesaa hēñh rahob had'yyt hē hyb n'aa. Nahëej tii bā rahoop doo.

karĕn doo da rababok, baad nado né paawä, nu meby n'aa nyy né paawä ti rah'yy karĕn doo. Séd hã bë bawĕh noo gó ragen'aak baad nadoo do sa h'yyb säg karĕn do ramoo bok bë sii rawĕĕ bä. Baad nado ta wób raheer'oot da bë ky n'aa tii d' bë mahang rababok do hyb n'aa. Tak'ĕp bë nu mebyk ran'oo bä. ¹⁴ Ýÿj sa patug wad'ii do hã rah'yyb padĕĕk had'yyt hĕ sa wĕ rababok hyb n'aa. Doo reréd nesaa doo. Rah'yyb tatuk sa da rah'yyb hedoo hyb n'aa P'op Hagä Do kyyh baad nahapäh do hyb n'aa nayyw hĕ h'yy keh'ÿÿt doo. Sa h'yyb ramet'ĕĕg däk, sa h'yyb karĕn do rahyb n'aa h'ũũm hyb n'aa. P'op Hagä Do ky n'aa was'ee padĕĕk do tii! ¹⁵ Reréd hõm ta tyw n'aa baad hadoo doo. Ti hyb n'aa baad nadoo do jawén rababoo däk. Barãm, Beor t'aah, p'ooj ub hawät do mo n'aa me rabad'oo. Tak'ĕp Barãm h'yyb däk paa ta säm hã, Isaraéw buuj majiĩ ta hã raky kajäk doo, Isaraéw buuj taky n'aa wasee hyb n'aa paawä. ¹⁶ Ta säm, ta hã raky kajäk do jawén tabahõm bä, ta tyw n'aa baa bä, P'op Hagä Do nabuuj gedoo mä ta hã. Hahÿÿ d' paa tii: Jumeto, ta mas'ãã tajawät doo, aj'yy kyy me tamaher'oot paah, dooh né paawä jumeto rahaja bä raheer'ood bä. Jumeto meduuk P'op Hagä Do ky n'aa rod Barãm häd näng doo, tamoo nawät hyb n'aa tak'ĕp baad nadoo doo.

¹⁷ Naĕng k'ããts gó naa ganyyh do mawooj däk do hadoo ta ti ma matĕg oow. Naĕng poo mahauk do tabĕs do hadoo. Ji wad'ii do tii. Ti hyb n'aa P'op Hagä Do enyyw däk sa hyb n'aa tak'ĕp badagyp doo, tadewäts bëĕh hyb n'aa gadagyp doo gó.

¹⁸ Daap hadoo do ti raheer'oot doo. Ti hadoo né hĕ,

kyyh tak'ëp hetsooh do rakamasab'ee do ji rama-her'oot, ta tii me rah'yyb tatuk hyb n'aa nag'aap hē baad nadoo do habok do mahānh kedēeb bong doo, nag'aap hē Jesus hā h'yy kae padēek doo, baad P'op Hagā Do kyyh hā h'yy ganenāh nā doo. Tahajaa, nāk mā sa kyyh, ji aā bā ji ŷŷm, ji patug nadoo do sii ji h'yyb säg karēn doo da né hē. Ta tii da rah'yyb tatuk sa hā. ¹⁹ Hahŷŷ da raky kajäk sa kyyh maa newēē do sa hā: “Āā ma metēek do bē gado bā, baad ub da bē babok tii bā. DooH mejō wāt pé bē hā”, nāk sa kyyh. Tii d' né paawā ta wób hā raky kajäk, nesaa do sa h'yyb karēn do karom ti ma matēg oow. Nesaa do mejō had'yyt hē sa hā. Bē hyb n'aa newē hahŷŷh: Ji hā j'aa ketsē doo, ti né hē ji hā mejūū doo. Nesaa do sa h'yyb karēn do j'aa ketsēē dāk sa hā. Ta ti sa hā mejūū do ti ramoo boo had'yyt hē. ²⁰ Hahŷ hyb n'aa ŷ wén her'oot ta tii da sa ky n'aa hā: Pooj jé ér Wahē N'aa, ér h'yyb tym dēeb, Jesus Kristo rabahapäh do hyb n'aa sa h'yyb gó, reréd hōm dó nesaa do badäk hahŷŷ hā habong do P'op Hagā Do hā h'yy kana'eeh do rabahed'oo doo, baad nado wäd ji bahadoo hanoo doo. P'aa hēnh kā ta ti nesaa do j'aa ketsēē bā sa hā, p'aa hēnh nesaa do ramoo bok do hyb n'aa, tak'ëp baad nado boo hŷŷ kā, p'ooj ub baad nadoo do rababok do bahānh kā. ²¹ Taw'āāts hē paawā ranahapäh baad hadoo do ta tyw n'aa P'op Hagā Do wē ji tamahūūm doo. DooH né paawā baad tado bā ji nahapēē bā ta tyw n'aa baad hadoo doo, sa hā paawā taw'āāts hē tii. Hahŷ hyb n'aa ŷ her'oot ta tii: Rahapēē däg né paawā baad hadoo do ta tyw n'aa, p'aa hēnh raberéd hōm tak'ëp hanām do P'op Hagā Do mejūū

doo. Ti hyb n'aa ta tyw n'aa nahapäh do bahänh P'op Hagä Do rejää da hÿÿ kä sa hä. ²² Sa hä kametä däk hahÿ pawóp hadoo do ji ky hetëg doo: “Awaar ad'ëëb jëng tehëen wät do paah.”† “Too yb hasus do mahänh hehob wät doo, p'aa hënh da tsapab gó takahep'uut.”‡

3

Jesus matëeh noo gó ky n'aa hahÿÿh

¹ Najis haa, pawóp däg bë ÿ ma erih do hahÿÿh. Pooj jé bë ÿ ma eriü wät doo, hahÿ na-ääj hë bë ÿ wén ma erih, bë hyb n'aa esee hyb n'aa pooj jé kaher'oot do paah, baad ub bë hyb n'aa newëë hyb n'aa. ² ÿ karën bë hyb n'aa esee p'ooj ub P'op Hagä Do ky n'aa rod tsyt hë ta wë kasëew bong do rahe'oot do paah. ÿ karën bë hyb n'aa esee na-ääj hë Jesus, ër Wahë N'aa, ër h'yyb tym dëëb mejüü do paah, ajyy Kristo mejüü do bë wë heboo nä do bë hä ma met'ëëg wät doo. ³ Taw'ääts hë baad bë bahapäh hahÿÿh: Jesus matëeh do pooj jé ti abok da nesaa do sa h'yyb karën do jawén habok doo, Jesus matëeh do ky n'aa rawajehëet doo. ⁴ Hahÿÿ da d' sa kyyh: “Matëeh mäh, taky däng paah. Te hub tado bä, ny tawät? Bë hegää”, näk, “ër wahë n'aa ër pooj jé habong do dejëb kän. Ti hadoo né hë, paa hado had'yyt hë. Dooh takaja bä tamatëeh

† **2:22** Pooj jé reréd hõm nesaa do ramoo bok doo, ta jawén p'aa hënh ramoo bok, tahanäng pé tii. ‡ **2:22** Pooj jé rakarën Jesus awug hõm nesaa do sa h'yyb gó hanäng doo, ta jawén p'aa hënh ramoo bok nesaa doo, tahanäng pé tii.

do pooj jé metëe n'aa.* Paa hado had'yyt hē badäk hahỹ kapahuuj wät noo gó naa”, näk da sa kyyh.
⁵ Dooch rakarēn bā rah'yy kadawuung bā, P'op Hagä Do ky haj'aa p'ooj ub wē kapahuuj wät doo. Dooch rakarēn bā rah'yy kadawuung bā naeng bā naa k'ãäts bawooj däk do ganyyh doo, ta ky haj'aa. Naeng tetyn hōm, bawooj däk do banyy däk hyb n'aa. ⁶ Dooch rakarēn bā rahyb n'aa es'ee bā naeng hag'yyp doo me P'op Hagä Do gawats'iik paa badäk hahỹ tapahuunh do paah, ta hā habong do sii hē. P'op Hagä Do ky haj'aa tii. ⁷ Wē, papỹÿj, kamarab, sagõõh, badäk hahỹÿ da hē ji hapäh do P'op Hagä Do enyyw däk, tii d' P'op Hagä Do ky däng do hyb n'aa, tēeg hōõ me ragawatsik hyb n'aa. P'op Hagä Do enäm nä ta tii. Tagawats'iik noo gó kã, sahõnh hē ta hā waneh'ëeh do tagawatsiig kãn. ⁸ Bē mabaan manä hahỹ najis haa: P'op Hagä Do hā sét pénh né hē sét ta baab, miw ta baab. ⁹ Dooch P'op Hagä Do hyb n'aa p'eed bā taky däng do tamoo wät hyb n'aa, ta wób red'oo. Tii d' nado. P'op Hagä Do ky däng do tawén kanajaa nä, bē tahyb n'aa b'aah do hyb n'aa. Dooch né takarēn bā gawatsik péh. Takarēn sahõnh hē rah'yy kawereem, ta hā rah'yy ka'eeh hyb n'aa paawä. ¹⁰ Ti hadoo né hē, Tak'ëp Hyb N'aa Jawyk Do kajaa né da. Rah'yy kanapeet bā, raganadaa bā takajaa da. Ji ganada do hadoo hets'ëek do kajaa. Ti hadoo Tak'ëp Hyb N'aa Jawyk Do kajaa doo. Nayyw hē wē gawatsik da, hawyp

* **3:4** Matew tēg eh do 24 hā takerii däk Jesus her'oot do takajaa do pooj jé metëe n'aa. Dooch ta ti kaja däg sa nooh, ta ti rawén wajeheët Jesus matëeh do ky n'aa. Nayyw hē Jesus matëeh, ta hā h'yy ka'eeh do wób red'oo. Nayyw hē takanaja bā kã, ta wób raky sēm Jesus ky däng do paah.

do hadoo. Sahõnh hẽ adẽẽ bẽeh da tak'ẽp haju do haj'aa. Tii bã dewuh da. Badäk hahỹỹh, sahõnh hẽ ta hã hanäng do na-ãäj hẽ P'op Hagä Do ky n'aa etyy da tagawatsik hyb n'aa.†

11 Tii da sahõnh hẽ P'op Hagä Do gawats'iik do hyb n'aa da, taw'ãäts hẽ tsyt hẽ nesaa do mahãnh baad bẽ babok P'op Hagä Do wẽ. Taw'ãäts hẽ P'op Hagä Do karẽn doo da bẽ babok, 12 baad bẽ gadaa nuuj jé Kristo kajaa doo, P'op Hagä Do ky däng do paah. Taw'ãäts hẽ nyyw hẽ ta ti kajaa bẽ an'oo bã.‡ Ta ti noo gó kajaa bã kã, wẽ aooj jëng da. Sahõnh hẽ adẽẽ bẽeh da tak'ẽp haju do haj'aa. 13 Sahõnh hẽ ta ti awäd né paawä, eër, Jesus hã h'yy ka'eeh doo, ẽr gada wẽ papuuj, badäk hahỹ papuuj P'op Hagä Do ky däng doo da. Jããm hẽ baad hadoo doo, P'op Hagä Do karẽn doo da habok do sa panang tii.

14 Ti hyb n'aa najis haa, ta ti bẽ gahëen do hyb n'aa, taw'ãäts hẽ tak'ẽp bẽ hyb n'aa tam'aah tak'ẽp baad ub bẽ babok hyb n'aa, tak'ẽp baad ub bẽ bahadoo hyb n'aa P'op Hagä Do hã. Tak'ẽp bẽ hyb n'aa tamah, h'yyb nyyw gó bẽ baboo had'yyt hẽ hyb n'aa ta wẽ, P'op Hagä Do bahapäh hyb n'aa. 15 Bẽ hyb n'aa newẽ hahỹỹh: H'yyb jawyg gó Tak'ẽp Hyb N'aa Jawyk Do gada nã, nyyw hẽ takanajaa,

† 3:10 Tahajaa na-ãäj hẽ ji erii bã: “Badäk hahỹỹh, sahõnh hẽ ta hã kapahuuj wät do na-ãäj hẽ aooj jëng da.” ‡ 3:12 Ji ky n'aa etsẽẽ, nyyw hẽ takajaa hyb n'aa. Ji h'yy kawareem P'op Hagä Do wẽ, takarẽn doo da had'yyt ji bawät hyb n'aa. Ji h'yy kahas'ããp Kristo ky n'aa ji mahũm do hã, sahõnh hẽ badäk hahỹ bã habong do raky n'aa napäh hyb n'aa na-ãäj hẽ, Peed hanäng pé tahyb n'aa péh, taw'ãäts hẽ nyyw hẽ ta ti kajaa bẽ an'oo bã, taher'ood bã.

ji kedëeb wät hyb n'aa banesaa hënh ji taky n'aa etyy do mahãnh. Tii da na-ããj hë Paw-Ro, ër hÿÿj hadoo do ër kamahãnh do bë tama erii wät. Bë tama erii wät P'op Hagä Do h'yy gan'yyh doo da ta hä. ¹⁶ Ti ky n'aa né hë tama erii wät sahõnh hë tama erih do hä. Tama erih do mahang ti anäng hãd hejoonh doo, tak'ëp ji hyb n'aa manatakä bä, dooh ji maa napëë bä tahanäng péh. H'yy gatamah doo, h'yy keh'ÿÿt doo, rawareem Paw-Ro erii wät doo. Ta see hadoo ta ky n'aa ran'oo bä. Tii da na-ããj hë rawareem P'op Hagä Do kyy kerih do wób. Sa daaj hë sa ky n'aa katakyyk baad nadoo do hä. ¹⁷ Ta ti bë hapëë däk do hyb n'aa, najis haa, taw'ããts hë bë hyb n'aa matakä, ta s'ee hënh P'op Hagä Do ky n'aa jaw'yyk do ky nadah'eeh do bë rah'yyb mahũm mahãnh te hub nadoo do rama metëek doo me. H'yy kanehÿÿd né paawä bë da hë, sa kyyh bë maa newë bä, bë da h'yy kah'ÿÿt. Ta tyw n'aa baad hadoo do bë erét da sa kyyh bë maa newë bä. ¹⁸ Taw'ããts hë P'op Hagä Do kyyh hã bë hyb n'aa matakä had'yyt hë, Jesus Kristo, ër Wahë N'aa, ër h'yyb tym dëeb bë wë taky enyym do takahũm had'yyt hë hyb n'aa, baad Kristo bë bahapäh hyb n'aa na-ããj hë bë h'yyb gó. Taw'ããts hë ti né hë ji j'aa etsëë had'yyt hë! ÿÿ. Tii d' né hë. Taw'ããts hë. Jããm hë kä.

Pop Hagä Do Panyyg Hanäm Do Hahÿÿh
The New Testament in the Nadëb language of Brazil
(BR:mbj:Nadëb)

O Novo Testamento na língua Nadëb do Brasil

copyright © 2011 Wycliffe Bible Translators, Inc.

Language: Nadëb (Nadëb)

Translation by: Wycliffe Bible Translators

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nadëb

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-29

PDF generated using Haiola and XeLaTeX on 11 Nov 2022 from source files
dated 22 Nov 2019
c5681c4e-55f8-5b64-badf-af07c5e28afc